



L. 18730 n





17^e Aoust 1588

Lettres Patentes 8

DV ROY, DECLARATIVES DES DROICTS, Priuileges & Prerogatiues de M^oseigneur le Cardinal de Bourbon.

Publié en la Cour de Parlement, le vingt-sixiesme iour d'Aoust, l'an 1588. 8



De saint

Matthe

A PARIS,

Par Federic Morel, Imprimeur
ordinaire du Roy.

1588.

Auec Priuilege dudit Seigneur.

2211 1/2 2100 I

Case

F

39

326

1588 file

THE NEWBERRY
LIBRARY



LETTRES PATENTES
 DV ROY DECLARATIVES
 des droicts, Priuileges, & prerogati-
 ues de Monseigneur le Cardinal de
 Bourbon.



ENR Y par la grace
 de Dieu, Roy de
 France & de Polo-
 gne, A tous ceux
 qui ces presentes let-
 tres verront, Salut.

SçA VOIR faisons que pour la tref-
 grande, singuliere & parfaicte ami-
 tié que nous portons à nostre tref-
 cher & tref-amé Oncle, le Cardinal
 de Bourbō, & pour estre le plus pro-

A ij

che parét de nostre sang, que no^r ay
ons à iceluy pour ces causes & plusi-
eurs autres, & bonnes & grâdes cōsi-
derations, à ce nous mouuans, desi-
rant mesmement luy faire cognoi-
stre de plus en plus nostre affection
en son endroict, & aussi rendre no-
toire à vn chacun le degré de con-
sanguinité & bien-vueillance, en
quoy nous le tenons : Auons de
nostre grace speciale, pleine puis-
sance & autorité Royale donné
& octroyé, donnons & octroyons
par ces presentes pouuoir, faculté &
auctorité de faire vn Maistre de cha-
cun mestier en chacune des villes &
citez de nostre Royaume : Et oultre
voulōs pour pareille cōsideratiō que
ses Seruiteurs & Officiers domesti-
ques & commensaulx iouissent de
semblables Priuileges, exemptions

5
& immunitiez dont iouyſſent noz
Officiers domesticques, lequel oc-
troiy par nous ainſi faiſt à noſtre dict
Oncle, enſemble toutes les creations
que par vertu de ce, il fera cy apres,
nous voulons eſtre de tel effect &
valeur, comme ſi nous meſmes les
auions faiſtes & donnees à noſtre
aduechement à la Couronne, & nou-
uelle entree en icelles villes & citez
de noſtre dict Royaume. S I donnōs
en mandement par ces meſmes pre-
ſentes, à noz amez & feaulx Con-
ſeilliers les gens tenans noz Courts
de Parlement, Chábres de noz Cóp-
tes, Courts de noz Aydes, aux Pre-
uoſt de Paris, Baillifs, Senefchaulx,
& tous noz autres Juſticiers, officiers
& ſubiets, ou à leurs Lieutenans &
commis, & à chacun d'eux ſur ce re-
quis, ſi comme à luy appartiendra,

A ij

qu'ils facent lire, publier & enregistrer ces presentes, & que de nosdits don, concession, declaration, faculté, puissance & auctorité, ils facent souffrét & laissent iouyr & vser pleinement & paisiblement nostredict Oncle, & ceux ausquels il aura donné & faict ledictes creations de mestiers de chacune desdictes villes & citez de nostredict Royaulme, sans leur faire mettre ne donner, ne souffrir leur estre mis ou donné aucun destourbier ou empeschement au contraire en quelque façon & maniere que ce soit. Car tel est nostre plaisir, nonobstant que nostre-dict Oncle n'ait fait & ne soit tenu faire aucune entree en icelles villes & citez. Et pource que de celsdictes presentes on pourra auoir affaire en plusieurs & diuers lieux. Nous voulons
qu'au

vidimus d'icelles deuēment collationné par l'un de noz amez & feaulx Notaires & Secretaires, ou fait foubz feel Royal foy soit adioustee comme au present original, en tesmoing dequoy, nous auōs signé cesdictes presentes de nostre main, & a icelles faiēt mettre nostre feel.

Donné à Chartres, le dixseptieme iour d'Aoust, l'an de grace mil cinq cens quatre vingts huit, & de nostre regne le quinziēme.

Signé,

HENRY.

Et sur le reply,

Par le Roy estant en son Conseil.

DENEUFVILLE.

Et scellé sur double queuē de cire iaulne. Et sur le reply à costé est encore escript.

A iiij

*Lewës & publiées & enregistrées, oy
& consentent le Procureur general du
Roy. A Paris en Parlement, le vintsixi-
esme iour d'Aoust, l'an mil quatre cens
quatre vingts huit.*

Signé,

DV TILLET.



REQVESTE FAICTE
PAR MAISTRE ANTOINE
Hotman Aduocat dudict Sei-
gneur.

MESSIEVRS, il a pleu au Roy
par ses Lettres parentes, des-
quelles la Cour a presentemēt
entendu la lecture, faire de-
claratiō en faueur de Monsieur le Cardi-
nal de Bourbon, (pour lequel ie parle:)
Premierement de la consanguinité qui est
entr'eux, le recongnoissant le plus pro-
che parent de son sang. Et en second lieu,
de la tres-grande, singuliere & parfaicte
amitié, que sa Majesté luy porte, comme
à son Oncle, tres-cher & tres-aymé.

C'estoit beaucoup à ce Prince, d'estre descendu en droicte ligne, tant du costé paternel que maternel de ce grand Roy S. Loys, vn tref-grand honneur d'estre le plus proche parent du Roy, mais beaucoup plus grand contentement d'en auoir vn si honorable tesmoignage de sa Majesté. Et pource il a eu charge de sa part, apres auoir tref-humblement remercié sa Majesté de la faueur qu'il a voulu luy impartir en ce regard, recongnoistre que combien ceste declaration ne puisse ny aduancer ny retirer en arriere le degré dont il a cest honneur d'atoucher sa Majeste', si est-ce qu'il aduoüera tousiours que ceste declaration luy sert d'vne estroicte & inuiolable obligation, de cōtinuer le reste de son aage, au tref-hūble seruice qu'il doit & à voué à sadicte Majesté. Car ce n'est pas peu de faueur que d'estre aymé, & recongneu

par son Prince, ce que l'õ est. Du costé paternel, estant de la maison de Bourbon, il est issu de Robert Conte de Clermont, fils puisné du Roy saint Loys, & du costé maternel il est fils de feuë Dame Françoisse Dallençon, fille de René Duc D'allençon: lequel encores qu'il feust distant de treize degrez de consanguinité du Roy François premier de ce nom, toutesfois à cause qu'il estoit du sang Royal & qu'il n'y auoit point de Prince plus proche que luy, il eust vne pareille declaration que celle cy, pour tenir le lieu & place de seconde personne de France, Il ne ne iouyst pas long temps toutesfois de ceste dignité, ains la remist tres-volontiers quand il pleust à Dieu faire ce bien & au Roy & à la France, de leur enuoyer la lignée, qui dure encores par sa mesme grace iusques aujourd'huy. Aussi Mõsieur le Cardinal desireroit qu'un pareil bien

l'aduint de son tēps en ce Royaume, n'ayāt
 rien tant en affection que de veoir des en-
 fans yssus de nostre Roy. Et neantmoins
 cependant par ceste déclaration qui im-
 prime en luy le caractère d'une si grande
 & si ample dignité, il se resent plus vne-
 ment atteint de la splendeur de sa Maiesté.
 Car cōme les astres n'ōt lumiere que celle
 qui procede des rayōs du Soleil, qui sont
 infinis, aussi les honneurs des Princes
 prouiennent principalement de la proxi-
 mité des Roys, quæ in infinitū exten-
 ditur. Il espere que ceste lueur comme e-
 stant desormais sans nuage, & a descou-
 uert, reflechira plus clairement sur les au-
 tres Princes de la mesme famille, selon
 qu'ils se trouuerōt plus proches de sa per-
 sonne, imitateurs de la pieté, & des ver-
 tus de ce bon Roy saint Loys, duquel ils
 sont descendus. à ce que nous ayons occa-
 sion de chāter à sa louange, Benedictus

Dominus qui non passus est, vt deficiet successor familiæ tuæ. Tous les Estats de la France sçauent de quel pied Monsieur le Cardinal à marché, quand il a esté question de la Religion Catholique, Apostolique & Romaine, pour la maintenir en son antienne splendeur & dignité, quel regret il a eu de veoir la profanation des sacrez misteres de nostre Eglise, & de quel Zele il a secodé les saintes intentions de nostre Roy, pour l'extirpatiõ des Heresies. C'est pourquoy non sans grande raison, & par la nature, & par la declaration du Roy, est aduenue vne si expresse remarque de grandeur à vn Prince de si grand merite: ayant en oultre de la liberalle faueur de sadicte Maiesté, priuilege de pouuoir faire des Maistres en chacun mestier, de toutes les villes & citez de ce Royaulme, & pour ses seruiteurs & officiers domestiques &

Commensaux, pareils Priuileges, immu-
nitez & exemptions que pour ceux de
la maison du Roy. Et pource ie supplie
la Court d'ordonner que sur le reply des
lettres, il sera mis qu'elles ont esté leues &
publyees & enregistrees.



Extrait du Priuilege.

Par lettres patentes du Roy, donnees à Paris le deuxiesme iour de Nouëbre, mil cinq cens quatre vings & vn, signees sur le reply, Par le Roy, PINART, & sceellees du grand sceel quidiect Seigneur, en cire iaune, sur double queue: verifiees tant a la Court de Parlemēt, Chambre des Comptes, des Aydes, qu'au Chastelet de Paris: Il est permis à Federic Morel son imprimeur ordinaire, d'imprimer ou faire imprimer, vèdre & debiter tous Edicts, Ordōnances, Mancemens & Lettres patentes, sans qu'autres Libraires & Imprimeurs les puissent imprimer ne faire imprimer, si ce nest du vouloir & consentemēt dudiect Morel: sur les peines contenuës esdictes Lettres. En outre a lediect Seigneur voulu que apposant par lediect Morel vn extrait sommaire de ses lettres, au commencement & a la fin de chacun des liures qu'il imprimera elles soient tenuz pour suffisamment notifiees & venuës a la cōgnoissance particuliere de tous ceux quil apartiendra, sans quil en puissent pretēdre cause dignorance.



21 or

